

Perseveranza e perfecziun: Ils tamburs da Domat

■ (rtr) **La Societad da schumbraders Domat è vegnida fundada 1931. Pliaras giadas èn ils tamburs da Domat stads campions svizzers. Actualmain dumbra l'uniun radund 100 schumbraders e schumbraders.** La Societad da schumbraders Domat, il num uffizial «Tambourenverein Domat/Ems», è vegnida fundada 1931 ed è enconuschenta lunsch sur ils cunfins chantunals. Adina puspè va la societad tar concurrenz chantonals e federalas per arbajas. A las concurrenz vegn schumbrà singul sco er en secziun. Ina cronica «1931–2008» documentescha la lunga tradiziun dals tamburs da Domat.

Exercizi senza misericordia

Il balcun tort da la Televisiun Rumantscha ha realisà 1971 in purtret dals schumbraders da Domat. En il focus stat l'exercizi che pretenda ina enorma disciplina. Mo cun perseveranza po la gruppa ascender l'olimp dals megliers tamburs en Svizra.

Campions svizzers

L'onn 1974 daventan ils tamburs da Domat per l'emprima giada campions svizzers en la categoria A da las secziuns. La paja per ina perseveranza onns a la lunga. Er ils onns 1978, 1994 e 1998 è la Societad da schumbraders Domat la meglra gruppa da tamburs en Svizra.

L'onn 1978 a la festa federala a Wil avain nus strusch carti: Nus essan turnads a chasa per la segunda giada sco campions svizzers.

Schumbrar per il papa

Blers tamburs da Domat han fatg servetsch en la Garda papala a Roma. Per render onur a quest servetsch ha la Societad da schumbraders Domat survegni 1979 in invit da Roma. Els han pudì sa preschentar avant la Garda papala. Da la partida ad in concert è er il papa Gion Paul II stà. Il balcun tort ha filmà l'event extraordinari.

Festas da baselgia

La participaziun a concurrenz da tamburs è mo ina vart da la societad. L'uniun ha ina lunga tradiziun en la vischnanca da Domat. Adina preschents èn ils tamburs a las festas ecclesiasticas. Quai mussa in purtret da la societad ch'era vegni realisà 1982 da Svizra Rumantscha.

La 18avla Festa da tamburs da la Svizra orientala

Mintg'onn vegn organisà en la Svizra orientala ina festa da tamburs. Las festas vegnan mintgamaì organisadas en ils lieus d'origin da las societads. L'onn 1997 ha il Telesguard rapportà da la Festa da tamburs da la Svizra orientala ch'è stada a Domat.

Il giubileum da 75 onns dals tamburs da Domat

L'onn 2006 festivescha la Societad da schumbraders Domat il giubileum da 75 onns. En ina contribuziun da Telesguard era il dirigent veteran Franz Willi sa regardà da ses tat ch'era stà tranter ils fundatur da la societad.

Il tamburs ed il tschaiver

Sper las concurrenz da tamburs e las festas da baselgia ha la Socie-

tad da schumbraders Domat anc in'ulteriura passiu: Far part dal til da bagordas. Quai è ina obligaziun per ils tamburs en la vischnanca da Domat che vala sco metropola dal tschaiver en il Grischun. L'emissiun Minisguard ha accompagnà 2012 ils giuven tamburs da Domat durant las emprovas musicalas per il tschaiver.

La promoziun permanenta da giuven tamburs

Per ch'ina uniun possa exister sur pliras generaziuns sto adina nova glieud giuvna vegnir recrutada. Tar la Societad da schumbraders Domat vegn dà gronda paisa da trair suenter novs tamburs giuven che sa mettan en ils stadals dals pli vegls che bandunan baud u tard la societad. Il Minisguard ha visità il 2016 ina emprova cun ils giuven tamburs.

La concurrenza da Domat: La Societad da tamburs Rabiuis

Onns a la lunga hai dà sper Domat ina segunda ferma gruppa da tamburs en il Grischun. La Societad da tamburs Rabiuis. Pervia da mancanza da manaders e da schumbraders è la societad vegnida schliada.

La Festa da tamburs da la Svizra orientala era vegnida organisada il 1987 a Rabiuis. Il Telesguard da la Televisiun Rumantscha aveva rapportà d'in tambur da Rabiuis ch'aveva gudagnà la concurrenza en la categoria dals giuven tamburs. En la categoria da las secziuns era Mustér i cun la prima, piz a cup avant ils tamburs da Domat.



Societad da schumbraders Domat è in'uniun da gronda tradiziun: Giuven e vegl fan part da l'uniun.